

Na kaminda pa Pais Kòrsou (5)

Ministerio Públiko

Edishon number 5 di nos página informativo ta trata Ministerio Públiko. Gobièrnu ta informá paso a paso kiko el a negoshá i palabrá ku e otro partnernan den Reino enkuanto struktura estatal.

1. Kiko ta Ministerio Públiko?

Ministerio Públiko ta e parti di nos poder hudisial ku ta persigui sospechosonan i trese nan dilanti' hues. Minister di hustisia ta responsabel pa Ministerio Públiko. Prokurador general ta na kabes di Ministerio Públiko. Bou di prokurador general tin e fiskal mayó.

2. Kon esei lo ta reglá den nos pais nobo?

A palabrá ku Kòrsou ta haña su mes minister di hustisia, su mes Ministerio Públiko i su mes mes fiskal mayó. Lo bini un prokurador general pa Kòrsou, Sint Maarten i e islanan Boneiru, Sint Eustatius i Saba huntu. E prokurador general ta na kabes di e Ministerio Públiko di Kòrsou, i tambe na kabes di e Ministerio Públiko di Sint Maarten i e Ministerio Públiko di e islanan BES.

3 Kòrsou mester hiba e mes maneho di hustisia ku e otro islanan?

Nò. Kòrsou ta haña su mes minister di hustisia i su mes Ministerio Públiko. E minister di hustisia di Kòrsou ta fiha e maneho di hustisia na Kòrsou. Ora ta trata asuntunan di Kòrsou, e Prokurador General ta sigui e maneho di e minister di hustisia di Kòrsou.

4. Kon un persona so por enkabesá tres Ministerio Públiko partí riba 5 isla?

Den e situashon aktual tambe nos tin ún prokurador general pa 5 isla. E kantidat di isla nunca no tabata un problema. E diferensha ta sí, ku den e situashon nobo dos di e 5 islanan (Kòrsou i Sint Maarten) lo ta pais outónomo den Reino. P'esei lo evaluá e punto akí bon atrobe aki 5 aña pa mira si e areglo ta funshoná bon den práktika. Aki 5 aña tur partner di Reino ta evaluá tur palabrashon atrobe, pa mira kua areglo por sigui kuné, kua mester kambia i kua por terminá.

5. Un prokurador huntu ta kita for di outonomia di Kòrsou?

Nò. Importante pa nos outonomia ta ku nos ta haña nos mes minister di hustisia, meskos ku awor Antia Hulandes tin su minister di hustisia. E minister di hustisia ta fiha maneho di hustisia di pais Kòrsou. E prokurador general ta ehekutá e maneho di hustisia di pais Kòrsou.

6. Kiko ta e 'Aanwijzingsbevoegdheid' ku tur hende ta papia ariba?

Esei ta un outoridat ku e minister di hustisia – miembro di gobièrnu di Reino – lo haña pa duna nos prokurador general instrukshon riba un asunto di krimen. E ta haña outoridat pa hasi esei na nòmber di gobièrnu di Reino i komo último remedi. Por ehèmpel: Un kartel di droga ta operá via Kòrsou, pero nos polis no ta aktua, nos fiskal no ta aktua, nos ministerio públiko no ta aktua, nos minister no ta aktua, nos parlamento no ta aktua ni nos Korte no ta aktua. Solamente si henter nos aparato di hustisia, di ariba te abou, keda sin hasi su trabou, e minister di hustisia hulandes por duna prokurador general instrukshon komo último remedi.

7. Si tin un emergensia sí e por duna instrukshon sin warda henter e aparato faya?

No. E por duna instrukshon solamente si nos aparato di hustisia faya. I finalmente, nos propio Korte di Hustisia por husga si e instrukshon tin base.

8. Pakiko gobièrnu a pidi konseho di Raad van State riba e punto akí?

Pasobra for di kuminsamentu gobièrnu a ekspresá duda si e punto akí ta kuadra ku Statüt. Gobièrnu ke siguransa ku e ta kuadra ku Statüt, meskos ku tur otro punto di e pakete ta kai den e quadro legal di Statüt. Gobièrnu ta spera konseho riba esaki di Raad van State, ku ta e órgano di konseho mas haltu den Reino.

Tambe Kòrsou a sigurá ku Hulanda no por hasi nada ku e outoridat di instrukshon, si nos mes no ke. Si nos Prokurador General no ta di akuerdo ku e instrukshon, e ta pidi nos Korte di Hustisia pa disidí si e instrukshon tin base, si òf nò. Ke men, e último palabra ta den nos mes man.

9. Di unda a sali direpiante ku e outoridat di instrukshon ei?

E no ta kompletamente nobo. Ya 55 aña kaba, segun Statüt, gobièrnu di Reino tin e outoridat pa aktua si sierto parti di nos gobernashon faya persistentemente i nos mes keda sin korihé. Pasobra segun Statüt ta Reino mester garantisá nos seguridat hurídiko, derechonan, libertatnan i bon gobernashon. E kambio ku Hulanda a trese den e negosashon ta pa e minister di hustisia – miembro di gobièrnu di Reino - kana dilanti di gobièrnu di Reino, i duna instrukshon na nòmber di gobièrnu di Reino, komo último remedi.

10. Gobièrnu ta kontentu ku e kambio ei?

Nò. Niun partido ni niun negoshador no gusta e areglo ei. Nos tur ta mes desidido pa e no kita nada for di e derechonan ku Statüt ta duna nos. Pero... e punto klave no ta si nos gusta e areglo òf nò. E punto klave ta kon nos ta dil kuné i si mester laga negosashonnan pega riba e punto akí. Gobièrnu ta tene kuenta ku mester yega na un akuerdo ku partnernan den Reino pa krea nos futuro nobo. P'esei gobièrnu a insistí pa laga Raad van State disidí si e areglo ta kuadra ku Statüt. Tambe nos negoshadornan a krea asina tantu barera rondó di e areglo, ku Reino no por hasi nada ku e outoridat ei, si nos mes no ke.

11. Ki efekto e areglo ei tin riba nos bida diario?

Niun efekto. Den e 55 añanan ku Reino por a aktua riba e tereno akí, nunca esei no a sosodé. Ke men, no tin motibu pakiko e minister di hustisia – miembro di gobièrnu di Reino - sí lo duna instrukshon pa loko na nòmber di Reino. Ademas e instrukshon por toka solamente investigashon i persekushon di krimen. E minister no por imponé niun lei den nos pais. Ku otro palabra, e no tin efekto riba nos bida diario.

E siguiente página informativo ta trata kambio di Statüt i konstitushon.



Bo ke un enkuentro informativo den bo barío òf pa bo grupo? Yama 4633225 pa un sita.